

Inneming der stadt CAMPEN van wegen de Staten



Onder Philips II. Gouvernerende Don Iohan, ende den Arch-Hertoghe Matthias.

CAMPEN by de Staten den eersten Iulij

beleghert/ ende haer overghegheben den xx.

der selfder maendt/ Anno 1578.

Als vele Neder-landtsche Steden haer selven in byzindom stelden/ de Hooch-duytsche Soldaten uyt hare Steden coopende/ ofte stootende/ soo bleven ghelijcke-wel binnen Deventer ende binnen Campen noch eenighe stercke Vaendelen Hooch-duytsche/ die aldaer wel ses jaer ghelegghen hadden/ vooz de Pacificatie van Gent; Binnen Campen lach het Vaendel van den Oversten Nicolaez Polkwijler/ ende Hans Casper Fong Compagnie/ t'samen ontrent vijfhondert Man sterck zijnde. Sy wierden des te beter gheleden/ om dat sy met den cost te vreden waren/ ende gheen extraozdinarise ongheregheltheit en bedreven: Oock soo hielden sy haer langhe als neutrael. Maer nae dat Don Iohan de victorie te Gemblours bevochten hadde/ soo verclaerden sy opentlijck dat sy het met hem hielden. Enige uyt de Riddereschap ende Steden van Overyssel/ beter Staets/ als Spaens zijnde/ sochten alle middelen om van dese Hooch-duytsche ontslagghen te worden: Haer docht dat de Grave van Rennenbergh, Baron van Ville, die doe Stadt-houder van Frieslandt en van Gzoeninge-lant was/ haer hier toe seer dienstelijck soude wesen/ daerom so hebben sy by de Generale Staten versocht/ om hem tot haren Gouverneur te hebben/ oock te ghelijcke om hulpe tot haerder verlossinghe biddende: De Staten hebben de Overysselsche geern haer versoeck ghegunt/ Rennenbergh is het Gouvernement van Overyssel ende van Lingen ghegheben. Hy begon strax te ptractiseren/ hoe hy Deventer ende Campen soude verlossen van die Hooch-duytsche Spaensghesinde garnisoenen. Hem werdt alle hulpe dan de omstighende ghebunzen toeghesent/ als van Gelderlandt/ Hollandt/ Frieslandt/ jaer daer werdt op eenen Landts-dach tot Zutphen den derden Iulij, dooz toe-doen van Graef Iohan van Nassou/ Gouverneur van Gelderlandt/ besloten ende verwillicht/ dat de belegheringhen der Steden Campen ende Deventer/ op ghemeyne costen souden uytghevoert worden.

Kennenbergh hadde op Campen eenen aenslach/ eer hy eenich groot volck by den anderen conde bzenghen/ om alsoo dese Stadt/ ware het hem mogelijkst gheweest te verrasschen. Tot desen eynde hadde hy eenighe van sijne Crijchs-lieden in de Stadt ghesonden/ gheleedt als Coop-lieden ende Handwercklieden/ die vooz-hebdenz waren de Wachters aen de Vene-poozte beck af te spelen/ ende de Poozte vermenstert hebbende/ Kennenberghers volck/ d'welck daer op lach te loeren/ in de Stadt te laten. Maer desen aenslach misluchte/ dooz dien eenen die dit volck in het Dorp Heerde ghesien hadde/ dat den Hooch-duytschen aen-seyde/ die ghewaershout zijnde/ wel op hare wacht ende gheweere paeten. Desen aenslach ghesalieert zijnde/ soo is Capiteyn VVolter Hegeman, in die tijden een vermaert ende cloeck Crijchsmā/ met sijn volck nae de Stadt van Campen ghetrocken/ ende heeft den aenbanck der beleggheringhe ghemaect den eersten Julij. Dese Stadt hadde des maels eenen schoonen hooghen muyr/ met veelderley fatsoen van schoone toozengz daer in ende daer aen constelijck ende cierlijck gemaeckt/ maer sonder Wallen ofte Bosse-wercken/ want daer nu sijn/ die daer nu sijn nae der handt aldaer ghemaect/ ghelijck nu teghenwoozdelijck/ dewijle ick dit schrijve/ aen de Vene-poozte een treffelijcke fortificatie gemaeckt wozt.

Tot beleggheringhe deser Stadt heeft de Prince van Oranien Kennenbergh ter hulpe ghesonden Joncker Diederich Sonoy, Gouverneur van Poozt-Hollandt/ met eenighe Neder-landtsche Compagnien. Sonoy daer ghecomen zijnde/ begoft strax met Bergh-kinapen te mineren/ by de Haven/ deselfde des maels liggende sonder Gracht aen den Dijk. Het gheheele Leger van Kennenbergh en was niet boven de duysent. Man sterck. Die van binnen vielen elcke reyse lustich ynt/ daghelijcx met haren vyandt schermtuserende/ met verlies van beyde sijden. De Magistraet/ om de Soldaten des te beter in ordze te houden/ liet Clippinghen munten van goet silver/ viercantich/ met Stadtswapen/ van de weerde van twee en veertich stuyvers/ de halve ende quaerten naer advenant/ en daer op stonden dese woozden/ *Extremum subsidium*.

Kennenbergh hadde ses Cartouwen van Utrecht ghecreghen/ de welke hy aen de Landt-sijde plantte/ ende schoot daer mede tusschen de Kalberecke ende Haghe-poozte/ een grasse van drie en dertich treden lanck. De Magistraet siende dat de Stadts-gracht/ door het instozten des muyrz/ bedeckt

was/ heeft den seventhienden Julij aen Kennenbergh geschze-
 ven/ ende begeert te parlementeren/ d'welck geern aenghe-
 nomen is/ ende zijn verdraghen/ dat de Hooch-duytsche/ be-
 houdens lijf en goet/ uyt de Stadt trecken souden/ midts
 belovende/ dat sy in drie maenden teghen de Staten niet
 dienen en souden/ des soudemen haer in sekerheyt gheleiden
 tot op des Kijser bodem: De ghevanghens ten beyden sijden
 werden los ghelaten sonder rantsoen. De Stadt heeft haer
 begheben in de Unie ende onder de ghehoorzsaemheyt van de
 Generale Staten. De Hooch-duytsche zijn den twintichsten
 Julij met pack en sack/ met Vzulwen en Hoeren/ met honden
 en hanen ter Stadt uyt ghetrocken. Dese Stadt soude des
 Graven van Kennenberghs ghewelt noch wel teghen ghestaen
 hebben/ want sy hadden noch van alles ghenoech/ ende de
 vzeffe was wel te repareren/ waer sy en verstonden desmaels
 den handel soo wel niet/ als sy nae der handt geleert hebben;
 Oock vzesdender vele Casmiri comste/ die alreets in het
 Landt was ghecomen/ met een groote heyz-cracht tot hulpe
 der Staten: Oock waren de Vorghers hare Hooch-duytsche
 cost-gangers/ cloeck in't eten/ traech in't betalen/ heel moede.
 Sint dier tijdt is die Stadt aen der Staten sijde ghetrouw-
 lijck ghebleven.

Campen, campt eenen goeden camp: Behoudt het gheloove,
 ende vvare Religie: So sal Godt voor u campen.
